

Aruba Lions Club a instala directiva nobo pa aña 2021-2022

Sra. Magaly Franken ta bira prome Lion Presidente femenino

RECIENTEMENTE Aruba Lions Club a celebra su instalacion di directiva nobo pa aña Leonistico 2021-2022.

Aruba Lions Club ta marca historia cu su prome Lion femenino como Presidente den persona di Lion Magaly Franken.

E aña 2021-2022 ta bira un aña inolvidabel pa Aruba Lions Club y specialmente pa Lion Magaly Franken.

Lion Magaly Franken t'e prome dama cu a drenta Aruba Lions Club na aña 2015. Esaki ta danki n'e pensamiento inovativo di miembronan den Aruba Lions Club cu n'e momentonan ey tabata consisti di solamente miembro masculino.

E anochi di instalacion a tuma lugar na Marriott Grand Ballroom y tabata e prome evento publico p'e miembronan despues di medidanan di Covid-19. Durante e anochi ameno aki, e Presidente saliente Lion Francis Leo a duna palabra di danki, a gradici tur esnan presente y a despidi di e miembronan di directiva saliente di 2020-2021. Lion Francis Leo a duna palabra di inspiracion pa tur compaño y a pidi pa sigui cu e bon trabou p'e comunidad di Aruba. A recorda tambe tur e trabounan cu a logra durante e momentonan dificil di pandemia.

Durante e anochi a duna reconocimiento na diferente miembro, e.o., e directiva saliente di 2020- 2021, Lion Edith "Dietje" Maduro kende a wordo nombra como 'Rookie of The Year' y Lion Clarice

Bufalini-Ras kende a wordo nombra como 'Lion of The Year'. Lion Clarice Bufalini-Ras t'e Leo Advisor y a coordina e proyecto di partimento di comestible. E proyecto aki a yuda mas cu 600 famia den necesidad durante momentonan dificil di e pandemia.

A duna reconocimiento n'e boluntarinan y nan a ricibi e 'Friends of Lions Appreciation Award'. Lion Bibi Arends a ricibi e 'Melvin Jones Fellow Award' pa su tur su trabou y logronan durante e ultimo añanan aki como miembro di Aruba Lions Club.

Lion Maximiliano "Bibi" Arends ta encarga cu e maneho



di proyecto di cama di hospital y rolstoel p'e comunidad di Aruba.

Por ultimo a duna un reconocimiento special na sra. Sharline Koolman. Sra. Koolman conhuntamente cu su team di DVG a sa di hunga un rol importante den e combatimento di Covid-19.



E directiva nobo pa aña Leonistico 2021-2022 ta consisti di: Sra. Magaly Franken – Presidente, sr. Roccini Anthony – Vice Presidente, sra. Emlyn Thiel – Secretaria – sra. Magaly Dijkhoff-Arends – Tesorera, sr. Kenneth Bikker – Director 2 years – sr. Igor Croes – Director 1 year – sra. Edith "Dietje" Maduro – Lion Tamer, sra. Clarice Bufalini-Ras – Leo Advisor y sr. Maximiliano "Bibi" Arends – Membership Director. Por ultimo miembronan di Aruba Lions Club a yama bon bini na miembro, Ricky Vijsma, kende a regresa como Lions despues di un tempo inactivo y a ricibi su kit di

miembresia di Lion Francis Leo.

E instalacion a ser clausura den forma di un brindis cu champagne unda e directiva nobo a brinda y a wordo felicita pa e otro miembronan di Aruba Lions Club. A termina cu e tema di president nobo di LCIF, Lion Douglas X. Alexander, kende ta "Service from the heart" y ta haci un yamada na tur Lion pa sigui duna servicio for di nos curason.

Pa mas informacion, por bishita e pagina di facebook 'Lions Club of Aruba' y e website: www.arubalionsclub.org